



22.04.2024

UPA2024/46

Inatsisartut Suleriaasianni § 33 naapertorlugu aalajangiiffisassatut siunnersuut imaattoq matumuuna saqqummiuppara:

Naartunermi, erninermi meeravissiartaarnermilu sulinngiffeqartarneq pillugu Inatsisartut inatsisaata allanngortinneratigut inuit qitornaminnik, aappaminnik inooqatigisaminilluunniit toqukkut annasaqaqsimatillugit qaammatit pingasut angullugit aningaasaateqarfimmit akiliunneqarlutik sulinngiffeqarsinnaanissaat anguniarlugu Naalakkersuisut peqquneqarnissaannik Inatsisartut aalajangiiffissaattut siunnersuut. Allannguut UPA2025-mi naammassereersimassaaq.

(Inatsisartunut ilaasortaq Peter Olsen, Inuit Ataqatigiit)

Siumuminngaaniit siunnersuuteqartumut inatsisartuni ilaasortaq Peter Olsen Inuit Ataqatigiit qujavugut.

Siumuminngaaniit ilisimaarivarput innuttaasuusugut qanitariittuusimasugut immitsinnut nalunngeqatigittuulluta amerlasuutigut tarnikkut aliasunnitsinni misiginneqatigittarnerput qangaaniilli ingerlatariuartuusimagippuk. Ilaqutariittut qanisatsinnik imaluunniit nalungilluakkatsinni toqukkut annasaqaqsimatilluta immitsinnut nukittorsaqatigittarnerput ileqqorisimamgippuk qangaaniilli siumuminngaaniit ilisimaarilluinnarpalput. Sulimi ullutsinni taamatut pissuseqarluta ingerlavugut.

Kisiannili nunatsinni innuttaasuusugut suliffeqarnitsinni assigiinngitsuusunik qanitatsinnik toqukkut annasaqaqsimatilluta aliasunnissatsinnik immitsinnut periarfissinngitsoorsinnaasarpugut. Taamatut aqquaagaqarnikkut inuttut tarnitsigut nukilaallisinnasarnerput assigiinngitsutigut maluginngisatsinnik takkuttoornermik kinguneqartarpooq. Tassa suliffigisamut inuttut tunniussimasuuneq killeqalersarpooq ilutsinni aliasunneq pigileraangatsigu. Ajorerusumillu kingunerlutsisoqaraangat qasunermik kinguneqartitsisoqartarpooq sulinermilu piumassuseerunnermik kinguneqarsinnaasarluni.

Ullumikkut sulisartut qanitaminnik annasaqaqarnermikkut ullut arfineq pingasut tikillugit sulinngiffeqarsinnaanerat periarfissaasarpooq, sulisitsisullu tapersersuineratigut aamma sivitsorneqarsinnaasarluni suliffeqarfiiit assigiinnginnerat aallaavigalugit. Taammaakkaluartoq aliasuttup atorfissaqartitani aliasunnerup nalaani tarnikkut eqqisisimanissaq pingaartitani naammattutut amerlasuutigut misiginngitsoortarpaa. Taamaammat siumuminngaaniit siunnersuuteqartup inatsisartuni ilaasortap Peter Olsen inuit ataqatigiinneersup siunnersuutaa siumuminngaaniit pingaartutut isigigippuk oqaatigissuarput. Siumuminngaaniimmip pingaartilluinnaratsigu innuttaasut alianartumik annasaqaqsimanerisa kingunerisaanik tarnikkut pitsasumik qaangiilluarnissaasa periarfissinneqartuarnissaat tamakkiisumillu nukittoqqinnissaannullu aqqtissiuunneqarnissaannik pingaartiitsigatta, suliffeqartullu suliffigisaminnut tarnikkut nukittorsimanissaannik uteqqinnissaat isumannaaqataaffigerusukkatsigu. Uangilu ukiuni kingullerni pisartuni annaasaqartarnerit meeqqanik annaasaqarlutik pisarnerni siumuminnganii uummatitsigu annaasaqartut misiginneqatigalugit pivagut. Taamatullu siumumiit kajumissaarutigissuarput inuttut tarnikkut atorfissaqartitsinersi aallaavigalugu kommunissinni tarnikkut artorsaateqarnissinni tarnip nakorsaani ikioqqusinnaanissarsi periarfissaammat atorluaqqullugu.



Taamatut siumuminngaaniit naatsumik oqaaseqarluta naalakkersuisut allannguutissatut siunnersuutigisaat isumaqataaffigalugu aappassaaniinnginnerani ilaqtariinnermut peqqissutsimullu ataatsimiitaliamut ingerlateqqipparput ataatsimiitaliamilu sulilluartoqarnissaanit kissaassilluta.

Mala Høy Kúko

Siumut